

# Powšitkowne WOZJEWJENJA

njedźelu, 30. meje 2021

## Wusyłanje Božich mšow

Serbskorěčnej Božej mši móža tutu njedźelu, 30. meje, znowa jako livestream w interneće scěhować. Dupołdnja we 8.30 hodź. přenjese so jedna z Kulowskeje, dalša w 9 hodź. z Chróšćanskeje cyrkwyje. Na swjedženju Božeho ćěla, štwórtk, 3. junija, płaci samsne rjadowanje. Linki na kemše su na stronje [www.posol.de](http://www.posol.de) kaž tež na internetowymaj stronomaj tuteju wosadow podate.

## Kemše na Bože ćělo

Na swjedženju Božeho ćěla, štwórtk, 3. junija, budu w Róžeńće kemše w serbskej rěči. Wone zahaja so w 19 hodź.

## Jeničce jedne njedźelne kemše

Wot njedźele, 6. junija, budu w Róžeńće jeničce jedne njedźelne kemše w 10.30 hodź. w serbskej rěči. Nyšpor w 14 hodź. wostanje kaž dotal.

## Wotewrjenje zahrody

Klášterska zahroda Zežiwjenskeho a zeloweho centruma w klóštrje Marijinej hwězdze je wot njedźele, 30. meje, zaso wopytowanjam přistupna. Wobstejace koronowe postajenja maja so při wopyće wobkedźbować.

## Kurs serbšćiny

Rěčny centrum WITAJ poskića wot pjatka, 4. junija, onlinowy kurs serbšćiny za započatkarjow, kotryž je wusměrjeny w přnim rjedže na partnerow serbsko-němskich swójbow zwonka Łužicy. Dokładniše a dalše informacije su pod [www.witaj-sprachzentrum.de](http://www.witaj-sprachzentrum.de) wozjewjene.

## Akcija „Łódź, ahoj!“

Wotrjad za swójbnu kaž tež džěcacu a młodžinsku pastoralku Drježdžansko-Mišnjanskeho biskopstwa přeprašuje wulke a małe džěci ze swojimi swójbami na tak mjenowanu jubilejny flashmob pod heslom „Łódź, ahoj!“ Wone su namołwjene, papjerjane łódže sfałdować abo spaslić – „pisane, wulke, małe, pomolowane, z postrowami, mjenom“, rěka w přeprašenju. Mnóstwo njeje wobmjezowane. Tute měli so potom hač do njedźele, 13. junija, na scěhowacu adresu posłać: Bistum Dresden-Meißen, Käthe-Kollwitz-Ufer 84, 01309 Dresden, Stichwort: Schiff, ahoi!

Samopaslene łódže pokazaja so na jubilejnym dnju, njedźelu, 20. junija, po swjatočnej Božej mši w Drježdžanskej katedrali na Dźiwadłowym naměšće. Paslenki maja być „mnohostronski symbol našeje Łódže Drježdžansko-Mišnjanske biskopstwo“, pisatej iniciatorce Claudia Leide a Daniela Pscheida-Überreiter. Link z mustrami k fałdowanju a z dalšimi informacijemi je pod [www.posol.de](http://www.posol.de) podaty.

## **Dalekublanje za člonow wosadnych předstejićerstwow**

Financny wotrjad Drježdžansko-Mišnjanskeho biskopstwa poskićuje člonam wosadnych předstejićerstwow digitalne dalekublanje přez platformu Zoom k temje hospodarske planowanje. Zajimcy móža mjez štyrjomi terminami na dwěmaj dnjomaj wolić: wutoru, 8. junija, kaž tež štwórtk, 10. junija, stajnje wot 17 do 18 hodź. abo 19 do 20 hodź. Zo móhli so zastupjerjo wšěch wosadow diecezy wobdźělić, smětej so z kóždeje wosady maksimalnje dvě wosobje wobdźělić, dokelž móža to naraz jeničce dwaćećo być. Přizjewjenja přijimuju so hač do pjatka, 4. junija, z mejlku na [annett.trepte@bddmei.de](mailto:annett.trepte@bddmei.de). Link z dalšimi informacijemi je pod [www.posol.de](http://www.posol.de) podaty.